

欽  
定  
全  
唐  
文



欽定全唐文卷二百三十三目錄

張說 十三

兵部尚書代國公贈少保郭公行狀

弔國殤文

奉勅赤帝壇祈雨文

祭城隍文

祭城門文

祭江祈晴文

賽江文



祭殷仲堪羊叔子文

并序

祭霍山文

祭崔侍郎文

爲河內王作祭陸冀州文

爲魏元忠作祭石嶺戰亡兵士文

爲魏元忠作祭石嶺沒陷士女文

爲人作祭弟文

爲人作祭弟文

爲鄭虛已作祭舅文



祭和靜縣主文

爲將軍高力士祭父文

爲伎人祭元十郎文



欽定全唐文卷二百三十三

張說 十三

兵部尚書代國公贈少保郭公行狀

公名震字元振本太原陽曲人也大父任相州湯陰令因居於魏公少儻廓落有大志儀觀雄傑身長七尺美鬚髯十六入太學與薛稷趙彥昭同業時有家僕至寄錢四百千以爲學糧忽有一人縷服叩門云五世未葬棺柩各在一方今欲齊舉大事苦乏資用聞君家信至頗能相濟否不問姓名以車載去一無所留深爲趙薛所誚公怡然



曰濟彼大事亦何誚焉十八擢進士第其年判入高等時  
輩皆以校書正字爲榮公獨請外官授梓州通泉尉至縣  
落拓不拘小節嘗鑄錢掠良人財以濟四方海內同聲合  
氣有至千萬者則天聞其名驛徵引見語至夜去奇之問  
蜀川之跡對而不隱令錄舊文乃上古劒歌  
曰君不  
見昆吾鐵冶飛炎烟紅光紫氣俱赫然良工煅煉凡幾日  
鑄得寶劒名龍泉龍泉顏色如霜雪良工咨嗟嘆奇絕疏  
璃玉匣吐蓮花錯鏤金環生明月正逢天下無風塵幸且  
用防君子身精光黯黯青蛇色文章片片綠龜鱗非直結



交游俠子亦曾親近英雄人那知中路遭棄捐零落漂淪  
古獄邊雖則沈埋無所用猶能夜夜氣衝天則天覽而佳  
之令寫數十本遍賜學士李嶠閻朝隱等遂授右武衛胄  
曹右控鶴內供奉尋遷奉宸監丞屬吐蕃請和親令報命  
至境上與贊普相見宣國威命責其翻覆長揖不拜瞋目  
視之贊普曰漢使多矣無如公之誠信遠近疆界立談悉  
定因遺金數十斤而還公悉以進上奏言揣彼上下之情  
人倦其隸役久矣咸願早和大將論欽陵不爭四鎮獨不  
欲耳但國家每歲不絕其使而欽陵常不稟命自然彼蕃



之人怨欽陵日深望國恩日甚設欲廣舉兵徒難矣斯乃  
反間之微旨也必可使其上下俱懷猜阻矣則天甚然之  
無何吐蕃君臣果相疑貳遂誅欽陵弟贊婆及其兄子莽  
布支並來降公聲名籍甚授御史加朝散大夫遷主客郎  
中吐蕃與突厥連和大入西河破數十城圍逼涼州節度  
出城戰沒蹂禾稼斗米萬錢則天方御洛城門酺宴涼州  
使至因輟樂拜公爲涼州都督兼隴右諸軍大使調秦中  
五萬人號二十萬以赴河西公至涼州吐蕃素聞威名相  
謂曰我贊普猶懼吾輩何可敵乎相率而去公收合餘衆



繕修城壁施法令屯田一年而復公之功也公以涼州西拒吐蕃北有突厥久示其弱未揚天威因徵隴右兵馬一百二十萬號二百萬集於湟州營幕千里舉烽號令時宗楚客爲相素與公不協令人告變則天惶懼計無所出狄仁傑魏元忠韋安石李嶠宋璟姚崇趙彥昭韋嗣立張說二十五人抗表請保如公有異圖並請身死籍沒則天由是稍安兵旣大集人又知教分兵十道齊進過青海幾至贊普牙帳贊普屈膝請和獻馬三千匹金三萬斤牛羊不可勝數公大張軍威受其蕃禮而還旣伏西戎震威北狄



突厥獻馬二千匹所獲涼州人士皆放歸塞上從此方鎮  
肅清蕃落畏慕令行禁止道不拾遺凡所規模制作率爲  
後法河西隴右十餘處置生祠堂立碑頌德閭立均等爲  
其文尋有詔許入朝公素無第宅寄居友人之舍屢被入  
朝忽有人馬前送狀開緘前人已去狀中惟有不盡而無  
姓名便於樹下獲騾馬二十餘匹帛三千匹公曰豈非太  
學請葬之士乎因以買宅居止薛稷趙彥昭聞之皆嗟嘆  
良久景龍年中宗楚客韋處訥等潛結朋黨憎功害能授  
公驍騎大將軍兼安西大都護四鎮經略使金山道大總



管時烏質勒久恃衆倨傲不屈朝廷縱兵遠掠道路不通  
公以衆寡不敵難以力制因率麾下數十騎徑入部落烏  
質勒大出兵衛出迎望見公威容端毅風鬣若神不覺屈  
膝因而下拜公宣國威命抗聲與語自朝至暮雪深尺餘  
竟不移足質勒頻拜伏語畢歸帳相去二十餘里質勒久  
立雪中倉卒疾發是夜暴卒其嗣子娑葛集諸將曰漢使  
殺我君父今須復讎大舉兵衆將追殺公聞質勒死遲明  
素服來弔道路相逢兵圍數匝娑葛見公忽來未之敢逼  
但言衛護漢使公至其帳下大哭流涕因撫定其嗣蕃人



大喜留數十日助其葬事娑葛獻馬三千匹牛羊十餘萬  
移居千里西域無事道路肅清諸蕃聞之遣使歸降者十  
餘國時人語之曰郭元振詭殺烏質勒知娑葛與闕啜有  
釁奏請移於瓜州制從之會中書令宗楚客受金遂寢其  
事公具以狀聞楚客恃勢囑請召公將陷之公從又奏  
請斬楚客清蕃落時韋庶人竊弄國權中宗竟不之省也  
初安西南有毒河源遠在葱嶺西北河岸百步人畜踏之  
者輒死公威振西域所向無不從者因驗圖經知其源率  
兵三萬人厯于闐康居大食等十餘國所過之國令供資



糧仍署其國王爲左右總管率兵前進北至慈嶺牙帳前  
十二國王兵百餘萬其河源上有大樹高千餘尺垂陰數  
頃大軍至日有黃龍繞樹以口吐毒氣而拒官軍三軍悉  
覩焉公手書操檄文令左拾遺張宣抗聲讀之畢黃龍解  
樹而下公率諸軍誅之數日方倒聚而焚焉河源且絕數  
十里內悉爲良田在安西十餘年四鎮寧靜韋庶人知政  
屢徵不至因下僞詔令侍御史呂守素中丞馮家賓相繼  
巡邊欲將害之未及皆爲娑葛等諸蕃劫殺之睿宗即位  
徵拜太僕卿勅至之日舉家進發安西士庶諸蕃酋長號



哭數百里或勢面截耳抗表請留因給之而後即路其至  
玉門關也去涼州八百里河西諸州百姓蕃部落聞公之  
至貧者攜壺漿富者設供帳聯縣七百里不絕公旌節下  
玉門關百姓望之宛轉叫呼聲動巖谷自朝至暮傳呼至  
涼州涼州城中男女在衢路並歌舞出城咸言我父至矣  
通夜城門不受禁制都督司馬逸客聞之謂公近矣陳兵  
出迎會候騎至云始入玉門關都督嗟嘆良久且狀聞至  
京同中書門下三品加銀青光祿大夫遷兵部尚書封館  
陶縣男依舊知政事尋轉吏部尚書知選舉囑請不行大



收草澤睿宗屢下詔褒美後默啜大寇邊拜刑部尚書充朔方道行軍大總管築豐安定遠等城以拒賊路尋加金紫光祿大夫再遷兵部尚書知政事仍舊元帥會太平公主竇懷貞潛結兇黨謀廢皇帝睿宗猶豫不決諸相皆阿諛順旨惟公廷爭不受詔及舉兵誅竇懷貞等宮城大亂睿宗步出肅章門觀變諸相皆竄外省公獨登奉天門樓躬侍睿宗聞東宮兵至將欲投於樓下公親扶聖躬敦勸乃止及上即位宿中書十四日獨知政事因下詔曰大臣立事夷險不易良相昇朝安危所繫兵部尚書同中書門



下三品上柱國館陶縣開國伯元振偉才生代宏量匡時  
經綸文武今之王佐出入將相古之人傑夙侍宸扆疇咨  
廟堂思致堯舜以期管樂朕往在儲闈洎登寶位每觀其  
仗義感激願制凶邪立誠慷慨密陳宏益爾其至矣朕實  
嘉之頃者梟獍興謀干戈作釁太上皇帝旣命朕除討元  
振又馳奉宸極始則賚予爲弼終則寧朕問安可謂格於  
皇天貫於白日元惡旣翦庶物惟新昌言是圖朕豈忘舊  
宜開井邑永誓山河可進封代國公賜實封四百戶物一  
千段子五品官尋兼御史大夫天下行軍大元帥是歲大



徵兵衆閱武驪山兵一百萬號三百萬並奉公節度是日  
三令之後上將親鼓公慮有大變因略行禮上大怒引坐  
纛下紫微令張說犯鱗而諫上乃曰元振有保護之功宜  
捨軍法流新州未至屬開元元年冊尊號赦曰元振往立  
大功保護於朕頃因閱武頗失軍容責情放逐將收後效  
可饒州司馬未至卒於道時年五十八有集二十二卷文  
章有逸氣爲世所重公少負氣縱橫遣意磊落作尉巴蜀  
不修名檢及登朝受任屢使遐方霜明烈心玉立貞節言  
行忠正居取儉約飭體雜於皇王致君期於堯舜公務之



暇手不釋卷雖子弟家人未嘗見其喜怒前後上事切諫得失十數道俱焚其藁草不以語人故朝廷莫知也睿宗嘗曰元振正直齊於宋璟政理逾於姚崇其英謀宏亮過之矣舊於宣陽里居二十餘年不至諸院馬廐每朝迴對二親言笑歸室儼如也不問家事與狄仁傑朱敬則魏元忠李嶠韋安石趙彥昭韋嗣立薛稷張說等爲忘言之友事父母以孝聞父愛授濟州刺史後以爲相奏請解職授銀青光祿大夫濟州刺史致仕公歿後二親猶在自我唐受命宰臣有二親者惟公而已



弔國殤文

北伐兮東胡邈遼陽兮孤竹偏師兮覆衆在崇山兮峽谷  
露芄芄兮蔓草風蓁蓁兮拱木見馬血兮夜燃聞殤魂兮  
雨哭君王按金鼓而氣憤撫珠鈴而淚滋橫萬里兮抽恨  
弔羣山而寫悲懟凶將兮我辱悼勇夫之狄纍彼前鑒兮  
未遠何後來兮不追對死地兮出陣臨傷門兮用師軍奪  
帥兮虹食壘車脫輻兮火焚旗有藥厲兮復矣無范宣兮  
媿之命窮迨兮短兵錯膚迎刃兮血染鏑旋殘潰兮棄組  
練山猶號兮谷餘戰殪原野兮柰何違君親兮不見於戲



何天命之奄忽俾仁義之理兵爲蠻夷之俘馘醜六校之  
飛將鎮五營之勁卒吾見出兮不歸噫名存兮身沒

奉勅赤帝壇祈雨文

維開元十年歲次壬戌四月壬申朔十四日乙酉曾臣侍  
中源乾曜中書令張嘉貞兵部尚書張說謹以清酌昭告  
於赤帝自冬涉春至茲夏首宿麥將秀時雨未洽皇帝降  
服減膳避正廢懸恐害粢盛是憂黎庶仁旨之勤已極兆  
人之感未通何辜於天而此不惠曾臣乾曜等同力聖日  
無敢怠荒薄才糝政多所不及神則不雨或此之由內訟



恒惶莫知啟處曾臣等若上無補衮下不利人妨功害能  
負恩竊位惟神臨照簡擇其心降禍厥身墜祿隕命三臣  
當咎足謝天責萬姓何辜俾失農望今因夏享展禮旣終  
上杼聖衷懇祈人命至誠必感佇流嘉液旨酒獻誠神其  
尚饗

祭城隍文

維大唐開元五年歲次丁巳四月庚午朔二十日己丑荆  
州大都督府長史上柱國燕國公張說謹以清酌之奠敢  
昭告於城隍之神山澤以通氣爲靈城隍以積陰爲德致



和產物助天育人人之仰恩是關祀典說恭承朝命綱紀  
南邦式崇薦禮以展勤敬庶降福四眚登我百穀猛獸不  
搏毒蟲不噬精誠或通昭鑒非遠尚饗

### 榮城門文

維大唐開元五年荊州大都督府長史上柱國燕國公張  
說謹遣議郎行錄事參軍皇甫嶧敢昭告於大府城門天  
有三光地有五行陰陽順序庶物以生霖雨過旬晦昧不  
晴柰何以陰賊陽以蒙蔽明恐害嘉穀無奉粢盛維爾崇  
墉本人所營積陰攸處德在助成苟人是利亦神之臧速



收雲雨以復天常報爾特豚薦爾馨香謹以清酌脯醢式  
陳榮事尚饗

祭江祈晴文

滔滔大江南國之紀協靈通氣降福禦災是載方冊代存  
祀典歲維秋季苗稼大熟雨霖猥集農夫未收油油秔稻  
垂生芽蘗上則神威將廢下則人心何仰公私憂窘靡禱  
不周訴爾明靈撒此雲雨欽儲牲幣俟荅神休謹以嘉酌  
脯醢敬崇禋請

賽江文



年月朔日具官某敢昭告於大江之神王有百谷禮尊四  
瀆善利維神朝海作賓發源岐山駕福來臻率此荆土明  
靈是主已成嘉穀垂敗霖雨聽我虔祈福我農畝旣暎旣  
穫旣塲旣庾欣欣衆心願荅神祐潔牲明酌寅奠江浦

祭殷仲堪羊叔子文

并序

荊州府城中西北隅舊有殷仲堪祠某到官廣其堂立羊  
叔子廟像成而祭之

維開元六年歲次戊午正月日荊州大都督長史燕國公  
范陽張某謹遣功曹參軍吳興沈從訓敢昭告於晉羊殷



二荊州之神我聞立人之道曰仁與義仁者孝之先義者忠之主殷公爲孝子羊公維忠臣行植晉國德施荆人不孤其美是建爲鄰雙風雖舊二廟維新凡百君子高山仰止馨香以時敬恭明祀尚饗

祭霍山文

長安二年月日皇帝使并州道大行軍副大總管尹元凱等敬薦酒脯時果敢告霍山之神皇帝天覆萬物各遂其性祠於羣神罔不咸秩獨彼凶虜默啜悖天虐人窺邊猾夏略無寧歲皇帝哀此黎獻勤於征役憫彼夷落毒於昏



暴常欲誅其魁首安是藩毗寇虐盈稔神人同棄今自送  
死并朔近驚山陵命將出師冀行天罰惟神炳靈參野作  
鎮冀方歌是正直贊揚威武俾胡馬化爲沙蟲王師衆於  
草木獻捷之日昭報神休尚饗

祭崔侍郎文

維神龍三年月朔日兵部郎中員外曹良史等謹以清酌  
少牢之奠敬祭故侍郎崔公之靈位以行成名以才起天  
臨明代是生君子長戟高門層堂峻趾孝友仁愛衣冠標  
軌清通正直省閣條理束帶立朝惟國之俊抑揚吐納金



聲玉振器不滯方神無留韻厚奉外不爲假坦率內不違  
眞汎交而容博好施而能均欲人規已恕已及人故者不  
遺其故親者不失其親歷否泰能全其節故令名不離其  
身方齊六相助明三辰何孤我德何負茲神搏空落羽中  
駕摧輪昔時寮列今爲弔賓凡二三子夙承惠眷聯務七  
兵歲陽三變分與時積事由更練蹇蹇公庭申申私宴慟  
音徽之永掩懷儀範之不見戢容止於綴足潛眉目於蒙  
面哀哉柰何涕零如霰緬惟初疾以迄將亡意氣精爽乾  
乾自強顧瞻賓客勉勉矜莊几不側弁衾無解裳話言靜



密憂公不忘猶看駿馬尚聽名倡靡神不禱靡藥不嘗倏然信宿魂歸渺茫歲初置酒春中酌觴何吉凶之共域同歌哭於此堂自古及今人誰不沒豈嘆生死所嗟倉卒修途未半壯志先伐煢子龔年遺允數月在親親與懷舊孰不傷心而痛骨靈奠易收深悲難歇尚饗

爲河內王作祭陸冀州文

維萬歲通天元年月朔日神兵道大總管河北道按撫使右金吾衛大將軍河內郡王以少牢之奠致祭故冀州刺史陸君之靈戎羯不道侵軼幽都凶渠電滅餘燎星鋪鳴



弓挾柳飲馬長蘆攬集同惡難起無虞梟獍爲旅鯨鯢有  
族裳旗來兵剡荻弦木泮渙吞噬睚眦觸逐亂舞梯衝潛  
攻版築鑿齒爭厲熊蹯未熟踰垣自潰守陴皆哭高局已  
陷連櫨復焚人類薙草城隨壞雲僵屍暴骨藉藉紛紛嗟  
嗟使君死節無吝政寬成俗兵機不振狡獪猖狂難以德  
鎮城爲仇保身膏虜刃明明上帝仁覆憫下赫赫神兵驅  
馳在野朝告夕赴如何不及將守非堅爲寇是急救兵適  
來涉血猶濕三軍雷歎百城雨泣天子命我董戎冀方旌  
旗介冑千里相望旣掃氛濁言巡戰場輯穆人吏撫寧孤



孀徘徊城府悽愴甘棠禮重王事哀深國殤魂兮有感歆此嘉嘗尚饗

爲魏元忠作祭石嶺戰亡兵士文

維長安二年月朔日勅并州道行軍大總管兼宣勞使左肅政御史大夫同鳳閣鸞臺三品兼知并州事魏之忠遣裴思益以酒脯時果之奠致祭於石嶺戰亡兵士之靈戎羯慢天南牧吠主石嶺橫地北都扃戶與我王卒保界并土如何不弔罹此寇虜列鎮旣嚴連巖旣削攻則路險守非城惡彼謀匪臧寔愆偕作援絕兵減軍孤勢弱地拒兩



陘山望雙嶂胡塵大起白刃交錯石盡矢窮旗焚冑落嗟  
爾戰夫烈烈忠勇奮不顧命志無旋踵身沒名揚生輕義  
重天子命我理兵晉陽思與士衆底寧遐荒痛茲壯士翦  
爲國殤盍訴天帝降厲鬼方助氣金鼓復怨沙塲虜血爾  
醢虜醢爾嘗封屍死所招魂故鄉尚饗

爲魏元忠作祭石嶺沒陷士女文

維長安二年月朔日勅并州道行軍大總管兼宣勞使左  
肅政御史大夫同鳳閣鸞臺三品兼知并州事魏元忠以  
酒脯時果之奠致祭石嶺死喪百姓之魂北胡自擅賊虐



不道氣悍朔風馬肥秋草侵軼郡縣驚逼稚老奔走山林  
是障是保兵不善守將不遠謀如何滅竈無復燒牛俾爾  
士女燼於寇仇魂飛狄刃血迸氈裘殤悲兩哭氣怨天愁  
總兵帝鄉言念北阜抗憤戎漠傷心按部泣弔郊童哀問  
田叟爲爾復惡誓滅羣醜蹴踏蘭山脂膏葦藪誠若克就  
沒亦不朽慰爾衆靈酹此簞酒尚饗

爲人作祭弟文

維景龍三年歲次庚戌正月癸丑朔五日丁巳從兄兵部  
尚書某以清酌少牢之奠致祭於故將軍弟之靈欽若貽



宴俾降戩穀神祚玉衣天開金屋縣系溢寵諸宗橫福覩  
交泰之二儀承序殷之九族引同本於條幹合分流於昭  
穆義有感而意深恩無方而情篤況山慕喬頂林晞秀木  
深仁遠慶俟子能復何從才之有餘而輔德之不足舉朝  
野而皆痛在密愛而尤酷嗚呼哀哉永懷令弟言念生平  
蘭華雪艷玉潤珠清禮樂懸解文章挺生三篋暗記十門  
畫成風流望美月旦傾聲掌北軍之師律首東觀之詞英  
偉壯夫之獻頌善仁者之論兵睠新豐而臨幸遶湯井而  
連營乃奉車之暴逝忽復綏而兇行軫天悲於宸掖固聚



族於華京惠連詩夢子敬琴情倘昭昭之不泯知親親之  
素誠嗚呼哀哉尚饗

爲人作祭弟文

維年月日兄某致祭亡弟尚書之靈天實喪予不慙遺善  
家殞玉樹國墜寶臣嗚呼執柔何痛之甚嗟予與爾夙遭  
閔凶哀惻相鞠殆及長成爾性實岐穎德表宣慈居盡友  
悌之心言必忠貞之事緜緜我族俟子而大奉祖德之令  
圖荷朝戚之渥惠白首相對紫綬雙紆爾旣秉國鈞旣敷  
朝典出牧千里入宰六官予聞爾言嘗誠過寵余嘉爾行



在貴能卑清淨溫恭每希於上士飲食車馬不越於平人  
每思與爾歸印東都懸輿故里揚名講德居常待終當謂  
老夫沒於汝手不圖令弟殞自吾先及爾纏疴屬予伏枕  
不見數日長悲九泉嗚呼刊述未成平生已盡髮膚猶在  
魂魄焉知聞爾屬纊之辰託予身後之事薄葬之禮還從  
爾心字孤之情不待遺意所恨在疾不視於喪不臨沈縣  
苦懷纏迫斯甚予羸老矣傷心幾何人琴兩亡命也命也

爲鄭虛已作祭舅文

維年月日外甥虛已謹以清酌少牢之奠敬祭於故汴州



司馬四舅之靈釁積周親天禍外氏仁舅捐館靈輶祖庭  
四海喪其範儀九族失其陰潤感今循昔觸緒增悲恭惟  
先門逮舅平日淵流莫逆道術同歸穆齊鄭之累姻深言  
孫之至友及鞠凶之際創巨失圖贈厚獲葬之恩事優舍  
哺之育顧省全立功歸撫惠竊荷濟於百罹思効過於一  
等豈其德素積而力莫躋願未伸而禍先集不孤之託緬  
爾何依猶父之心忽焉罔報冥昧靡覲存亡永違執饋奉  
酌五性含塞幽靈昭察當歆宿誠

祭和靜縣主文



維年月日敬祭薛氏太夫人和靜縣主之靈惟夫人軒庭  
繁祉羸臺茂淑承訓公宮宜家卿族博士學藝尚書題目  
法度蘋蘩儀刑松菊夫拜中令昔同鮑婦子昇瑣闥今類  
馮母舉案如賓闔門誠友在貴能降居貧施厚天道初革  
王風變韶維城落構若木踈條欽聞積善智洽神昭克庇  
二族命服兩朝肅肅柔和如風是暢娥娥女師如月斯望  
潘輿獻壽仲祿方養不弔昊天何德之喪嗚呼哀哉洛邑  
啟殯長安歸陌哭慟高臺旌懸舊宅階濕夜露庭陰曉魄  
嗟我外姻俱成弔客



爲將軍高力士祭父文

維開元十七年月日孝子力士敢告於考潘州府君妣南海太君之靈小子不天夙齡閔凶身嬰寇剽家值虜裂幸供洒掃之餘遂蒙侍從之顧扶戴明聖逼畏艱難大固不敢不密小亦不敢不誠事必記心言無漏口日愼一日將二十年玉弁加首金章在佩先靈納祐明神降鑒阿母遠至於京華妹兄自拔於泥滓咸以官漸榮祿姻通士林慈顏復慶於目前同氣展歡於膝下又緣幼育高氏變族移家敬愛盡於二堂溫清周於一紀不圖無狀招禍永見孤



棄聖主恩華曲逮存沒邑封舊郡官贈本邦親感恩澤子  
承父意致命報天誓有同於皦日竭忠資孝志無忝於幽  
泉敬惟靈懷慰聞昭遂先遠有日卜兆新塋遙啟尊魂合  
祔良壤哀迫祖載攀戀須臾謹以清酌少牢恭陳遣奠盈  
罇不舉虛饌莫嘗號天叩地殞絕何仰

爲伎人祭元十郎文

維神龍三年月朔日故伎人伏十善謹以清酌少牢之奠  
致祭於元十郎之靈渌流茂樹萍羅是依山崩川竭魚鳥  
何歸恭惟主君高才達節賞心樂事風流不絕歌艷露華



舞迴春雪幸持此技承君餘悅綺羅脂粉嬌上春自言終  
代保情親寧知一旦君恩斷繁絃清管爲何人懷主君之  
異顧願徇命於九泉迫夫人之嚴旨遂投足於他門生有  
十年之愛沒無一日之恩雖強容飾於新奉心摧絕而不  
敢言君子廣德仁心必遍疇昔與君琴鐏懽宴永懷蕙歎  
俯憐荼苦錫以時珍申哀故宇歔車旣展祖奠斯開悲歌  
助挽長袖承杯平居好此魂來不來心思往而莫遂足欲  
返而遲迴終天地於此訣毒煩冤而難裁



欽定全唐文卷二百三十四目錄

張楚金

樓下觀繩伎賦

透撞童兒賦

崔神慶

請定宣召太子儀注表

劉憲

對墳樹有甘露判

上東宮勸學啟



大唐故右武衛將軍上柱國乙速孤府君碑銘  
并序

梁朱賓

大唐故朝議郎行澤王府主簿上柱國梁府君并

夫人唐氏墓誌銘  
并序

朱寶積

彌勒尊佛碑



欽定全唐文卷二百三十四

張楚金

楚金并州人贈工部尚書道源子鄉貢進士擢第高宗朝  
爲刑部侍郎武后朝遷秋官尚書賜爵南陽侯爲酷吏周  
興所陷配流嶺表卒

樓下觀繩伎賦

惟千秋之令節啟聖壽兮無疆詔百辟以高會挾宸歡而  
未央地勝樓闌天清氣涼禮容克備樂府斯張翕赫留霍  
熒熒煌煌伊曠古之未有豈名言之得詳廼有殊伎特異



呈材累至動不勤物用非假器觀夫立象蓋取諸意本自  
宮中之傳名爲索上之戲掖庭美女和歡麗人身輕體弱  
絕代殊倫被羅縠與珠翠鋪瓊筵與錦茵其綵練也橫亘  
百尺高懸數丈下曲如鉤中平似掌初綽約而斜進竟盤  
姍而直上或徐或疾乍俯乍仰近而察之若春林含露吐  
陽葩遠而望之若晴空迴照散流霞其格妙也窈窕相過  
蹁躑却步寄兩木以更躡有雙童而並驚還迴不恒踴躍  
無數驚駭疑落安然以住雖保身於萬齡恃君恩於一顧  
節應鐘鼓心諧律呂履冰谷兮徒云臨焦原兮虛語是時



齊謳輟響趙舞掩色絲桐發而沮勢丸劒調而挫力方今  
寰海清太階平兵革不用兮國無征風雨旣洽今年順成  
上曰可樂人胥以亨大則有燾載之義小則無角抵之名  
固端拱而成理豈繫物而爲程者哉

透撞童兒賦

卓絕之伎不爲則已爲必陵羣駭目駕俗驚耳觀透撞之  
兒信其然矣雲竿百尺繩直規圓惟有力者樹之君前傳  
傳就日亭亭柱天鬼魅不敢傍其影鷁鷁不敢翔其顛此  
兒於是跂雙足戟兩臂踴身而直上若有其翅盡竿而平



立若餘其地人以爲難我以爲易人以爲恐我以爲戲難中有戲戲中有難倒輕軀墜高竿如更羸之鴈下空裏似蒲且之鶴落雲閒不識者謂之尚奇好絕自取其殘眼爲之慘心爲之寒怖甚蓋粉之勢不敢仰看庸詎知所憑之竿暗相扶所恃之術私有準掩都盧其若無顧驚戲而足哂屹然中駐餘勇不盡於時也解雀散鳥逃龍走魚跳劍臂折呪刀口哇一場之內獨雄雄如旣而天眷偏及天顏賜喜曰其絕人有如此其服人有如此豈止投竿之兒抑由持竿之士持若不定或掉而或傾透雖自強何怙而何



恃乃迴天札題其兩絕降天酒賞其雙美斯道也誠則小  
哉可以感於知己

崔神慶

神慶貝州武城人舉明經武后長安中官太子右庶子封  
魏縣子神龍初坐前推張昌宗獄不實流欽州卒年七十  
後贈幽州都督

請定宣召太子儀注表

臣伏思五品以上所以帶龜者比爲別勅徵召恐有詐妄  
內出龜合然後應命況太子元良國本萬方所瞻古來徵



召皆用玉契此誠重慎之極防萌之慮臣昨見緣突厥使見太子合入朝參直有文符下宮曾不降勅處分太子當時又報臣云昨日至晚侍奉不見聖人諭及遣來今者直準臺符入朝事得安否臣又思周禮儀注例皆奏聞臺符所下必將非妄臣又自到朝堂審知是實所以太子遽往當今人稟淳化內外同心然古人慮事於未萌之前所以長無悔吝之咎況太子至重不可不深爲誠慎以臣愚見太子旣與陛下異宮伏望召太子先報來日非朔望朝參應須宣喚伏望降墨勅及玉契以符重慎之道



劉憲

憲宋州寧陵人第進士累除鳳閣舍人神龍初坐爲張易之所引自吏部侍郎出爲渝州刺史景雲初遷太子詹事卒贈兗州都督

對墳樹有甘露判

楚州申殷賢喪親負土成墳甘露降樹芝草生  
廬青鸞鎮集白鶴翔翔縣令張德以爲孝感刺  
史欲旌表鄉人梁靜告國家祥瑞

殷賢名編荆楚行達神明實稟先賢之風遍聞至孝之感



甘露降其樹還同淚柏之林芝草生其廬即在寢苦之室  
雖禎祥驟委諒神理無欺而謗議是興爲鄉人所惡且求  
諸故事抑有前聞率土莫非王臣含靈皆用天道通論則  
歸於有國析理則存乎其人以匹夫之感皆爲王者之瑞  
則皇天所相何彰孝德之深梁靜須正刑書刺史不煩疑  
惑

上東宮勸學啟

臣以今月二十二日侍從外參親奉令旨令臣勾當所進  
書隨了隨進并語臣云當今閒暇正好讀書臣自承殿下



之好尚私心歡喜不能自勝伏惟天縱神武生知睿哲誠  
時與理會固無待勤求然自古及今皆重於學至於光輝  
盛德發揚令聞安靜身心保寧家國除此之外更無以加  
常人讀書擬干爵祿事須精熟乃堪試練殿下居副君之  
位有絕世之才豈假尋章摘句哉蓋應略知大意而已用  
功甚少爲利極多伏願克成美志無棄暇日上以慰至尊  
之心下以答庶寮之望幸甚幸甚侍讀褚無量經明行修  
在朝罕匹是以皇帝簡擇令侍殿下謂宜時蒙召問而察  
其言臣以愚劣忝跡士端區區之誠莫不罄竭謹啟



大唐故右武衛將軍上柱國乙速孤府君碑銘

并

序

武之去競與文德而競馳陰之爲功配陽和而並運利用  
厚生之事依古以來折衝禦侮之材何代蔑有秦之強也  
起翦恬實用其兵漢之盛也辛李衛霍爲其將大唐操斗  
極把鉤陳帶甲百萬授鉞四七其有中分麾下總堂堂正  
正之師儼若敵國負赳赳桓桓之稱者在於乙速孤府君  
矣公諱行儼字行儼本姓王氏太原人也五代祖有功於  
魏始賜而氏焉因居京兆之醴泉縣王子晉之上仙肇開



茂緒車千秋之作相重錫華宗家何代而乏賢人何時而  
不貴曾祖安齊前鋒都督右武侯右六府驃騎將軍開府  
儀同三司上柱國河州刺史隨益州都督襲封和仁郡開  
國公徙孝移忠遷虞事夏司馬安之四至晏平仲之一心  
祖晟皇朝上開府右武侯右甘府左車騎將軍驃騎將軍  
藏器於身待時而用功參列將寵盛興王父神慶右虞候  
副率檢校左右領軍衛將軍氣岸瓌傑志力雄武持軍以  
禮陰德有徵才子挺生將門斯在公鍾家代之休烈奉韜  
鈴之成訓鵬圖奮於霄漢鸚鵡陣溢於風颺得射法於僊靈



習軍容於嬉戲子房智勇時其無敵卻縠詩書頗亦兼善  
永徽中司成生擢第明慶中丁父憂性實過人俯而就禮  
麟德初授宣德郎號王府記室參軍事閒平邸第枚馬交  
遊曳裾其閒首席推美咸亨元年以將門子弟授振威校  
尉守普濟府左果毅都尉丁太夫人憂哭泣之節饘粥之  
數復如居府君之喪儀鳳二年勅除興國府右果毅都尉  
鎮河源軍定州道遊奕護河陽橋垂拱二年授游擊將軍  
黃城府左果毅都尉致果爲毅治戎以律洗兵鹽澤秣馬  
中山護濁河之橋綰黃圖之府智謀洋溢威武紛綸功靜



朔垂氣雄京邑永昌元年制除朝散大夫縣州司馬天授  
二年加朝議大夫長壽二年除資州長史延載元年加中  
散大夫題輿縣外展驥資中風俗所同政教如壹證聖元  
年制除使持節萬州諸軍事萬州刺史萬歲通天元年制  
加中大夫二年加大中大夫其年檢校永州刺史聖曆二  
年授使持節都督夔歸忠萬渝涪肅等七州諸軍事守夔  
州刺史三年授使持節都督廣韶端康封岡等十二州諸  
軍事守廣州刺史長安三年授使持節泉州諸軍事守泉  
州刺史神龍元年授使持節都督黔辰沅等州諸軍事守



黔州刺史其年加正議大夫神授政理之材天挺公侯之  
表故能方州典郡盡周官牧伯之尊越海凌山窮禹貢荆  
揚之域控御數千里周旋廿年化洽夷夏功成方國置生  
祠之廟往往而存畏清酒之盟于今莫犯神龍二年墨制  
授忠武將軍守右武衛將軍員外置同正員特勅停南衙  
上下專委北軍事羽林之任歷代爲重用周勃而後安召  
宋昌而先拜以公確乎忠信厲然壯勇頒命卿之秩掌孤  
兒之軍宿衛陞殿而逾嚴徼巡巖廊而匪懈壘垣增肅軒  
禁穆清錫御府之金錢分大官之玉食殊恩所逮中使相



望而執

關一

持戟筋力爲倦輸節竭誠心術俱盡神用疲

而致損腠理勞而生疾其歲夏中遇病廳事半體云廢經  
時未瘳願休攝於家庭遂遲迴於天闕陳情拜䟽理切詞  
殫有感宸衷特聽致仕仍褒美績更惜羸痾睿旨殷勤形  
乎綽翰公結欬而辭雲陛投迹而返私門懸廣德之安車  
施仲翁之行馬仙方上藥冀養性而延齡芳醞嘉羞且忘  
憂而永日而公素無息允命昆弟之子令從爲嗣鞠育俾  
於已生仕爲太子通事舍人坐外氏累左除溱州扶驪縣  
令公天屬爲重旣切猶子之慈門寄所鍾何深舐犢之念



亦既離譴舊疾暴增春秋七十有二景龍元年十二月十  
五日薨于大寧里第嗚呼哀哉惟公盛德溫恭雅懷寬肅  
行無文飾言不浮華出身入仕儀家刑國靡欺暗室獨運  
虛舟於人之善無所遺於人之惡無所記可疑之地投足  
莫踐弗稽之謀措心所絕親友信而敬之老少安而懷之  
惟汲汲以行仁豈遑遑而求利防衛之際屢有奇功撫字  
之方亟彰靈感公之在永州也屬時闕一不登土人多餒  
罄倉儲而罕贍据山谷而無資所部界分素饒稻竹盤根  
合翠彌漫蒼然忽於一朝結實咸徧若五穀之含穎油然



可觀比千箱之載詠俄而告給人皆和

闕三字

盈路公仍持

數石奏進京師聖旨咨嗟嘆其靈味公之在夔州也鄰界

不虞羣蠻暫擾侵軼城郭殘傷吏人公不俟制命星言致

討威靈震蕩氛穢廓清稽顙咽於巫雲

闕三字

於江水天朝

命將甫戒於師期邊郡飛書已聞於戰捷雖耿弇之不遺

賊於君父亦何以尚茲時嘉乃功璽書慰勉疾亟之

闕一字

思慮彌長遺書戒令從曰吾遭遇

闕四字

卅餘載恨無以報

不敢絲毫有負於聖朝家業素貧喪葬所須務從節儉勿

違吾平生志也所樹碑務令存實無爲虛美以掩吾真爾



等唯清唯慎勿矜勿伐則吾死而無恨矣夫人常樂縣君  
賀若氏宋公弼之姪孫開州刺史懷武之第六女門宗之  
盛鐘鼎連華家室之歡瑟琴齊契春秋五十一證聖元年  
八月五日亡於萬州官舍維景龍二年歲次景申二月辛  
卯朔十六日景午合葬於雍州醴泉縣白鹿鄉李中川先  
府君之塋次禮也嗣子令從叫叫穹蒼哀哀霜露永言闕  
字誓終身奉行子壻右驍衛鎧曹參軍安定梁望之代業  
通家天資長者冰清玉潤常懷國士之恩石字金書願託

中郎之筆

闕二  
字

言行乃作銘云



公侯子孫必復其始將門有將其來久矣伊我將軍奕代  
爲美壯勇傑出威稜峻峙文則循良六條千里武以侍衛  
嚴除軍壘黃霸匪傳宋昌寧擬中外從闕三勤止年至禮  
優神勞疾起有生終謝令問不已賢哉伏波誠其兄子

梁朱賓

朱賓雍州藍田人

大唐故朝議郎行澤王府主簿上柱國梁府君并

夫人唐氏墓誌銘

并序

君諱寺字師暕雍州藍田人也丕承帝緒自雍墟而逮夏



陽克勤王家由安定而宅京兆其如萬氏昆季列於三方  
有類林家昭穆光乎十德至若衣冠禮樂之盛烈廉孝賢  
良之儀表固以爲奕當代昭彰季業者乎曾祖遵周秦州  
清水縣令遽賒相用勞逸兼資重泉之磬載昌單父之琴  
斯洽祖殊隨監門錄事參軍德以潤身學以從政八屯由  
其式序五校於是克隆父柱皇朝奉義郎騎都尉識量夷  
雅風神耿介青田表秀丹穴摘祥進而不榮安乎散列退  
而不野鄰乎湫隘君承積善之餘祉挺生人之上姿因心  
而好孔墨挽跡而齊曾閔縱王佐之奇表揚於王庭屈公



輔之宏量薄遊公府咸亨四年授文林郎隨班例也日者  
東風爽侯西旅不庭三軍乏坐甲之資七萃興懸磬之歎  
君散陶凝慮指困推誠躬親饋饁之勞式周儲峙之務恕  
己及物下布人謠憂國忘家上紆帝念永隆二年恩詔授  
上柱國道光西漢已極武功之尊名冠南荆竟保昭陽之  
貴既而上僊興慕下代纏哀梁山降白鶴之祥畢陌啟青  
烏之兆君深悲考逝義切子來茂績顯於園塋豐功徹乎  
旒展垂拱元年授朝議郎行澤王府主簿以救馬之英規  
偶閒平之上邱芳風扇乎蘭坂茂躅隆乎桂山東閣由是



希聲西園以之藉甚豈期攝生謬理與善失常西山何高  
未接仙童之羽南溟尚遠翻墜化鵬之翼以垂拱四年十  
月五日終於長安懷德里第春秋卅有一夫人晉昌唐氏  
名惠兒後魏驍騎將軍本部守契之七葉孫即故司農寺  
長樂監敏之第二女也巫山降祉巽位摘精挺琬玉以成  
姿懷冰霰以清慮纂組織紉之務早擅女工幽閑婉孌之  
規夙彰婦德恭謙娣姒宗族所以推先肅事舅姑閨門由  
其作訓將以鵷驂並驚常接影於仙樓不意龍劍雙沈竟  
連形於寶匣以垂拱四年九月廿七日終於長壽里第春



秋卅有六粵以其年十一月十七日合葬於終南山梗梓  
谷口隋信行禪師林側陪大父錄事參軍之舊塋由夙志  
也惟君器周大雅德備中和敏殫衆藝好兼靈迹牟子博  
之異錄動息會其情虞孝敬之奇記俯仰明其術黃金積  
釜鎮寫真容白玉成田併開精舍夫人亦凝心貝葉屬思  
曇花幼彰龍女之功長契勝鬘之德婉茲嘉偶咸借慶於  
一乘倬彼好仇並歸神於八正其子景先等以爲形資業  
起業立則形存化以緣生緣亡則化息履霜增感豈若奉  
於遺音聞雷警墓固可託於真侶式崇寶構虔考勝因寄



篆刻於幽挺庶飛芳於奪里其詞曰

有秦支子始國於梁帝堯景胄必復其唐易代載德繼軌

傳芳雅符秦晉信叶潘揚

其一

於惟君子夙承家慶顯允夫

人早標門令笙簧其德黼藻其性問望備隆容工兼盛

其二

身由業立果乃因成共資有相並證無生八正凝想一覺

馳情德踰善德名蓋淨名

其三

積善方融輔仁無準始驚炭

折俄看薪盡悲哉則豹騎連翔痛矣則螭軒接軫門庭兮

蕭索墟落兮淒緊

其四

哀哀鞠子感感遺孤共詳勝地式奉

先墓構曾臺於翠阜刻貞石於黃壚山山兮靈塔往往兮



真徒其五

朱寶積

寶積瀛洲人喪親廬墓以哀毀卒

彌勒尊佛碑

若夫真宗奧鍵言象昧其津源俗諦法門性

闕一字

詮其教

義自三天錫福十聖揚猷道俗薰修階資積習若海流懸

闕一字

涵

闕二字

而

闕一字

天江源濫觴下歸塘而括地至如

闕一字

字

波傳話素契

闕一字

於菩提墨血摘文

闕一字

志期於上德

善才童子求友不逾於十城羅刹聖僧談經無過於半偈



未有濟巨川而棄楫昇彼岸而

闕二字

者哉粵若大覺乘乾

天仙利現應賢劫而開運耀佛日以光臨載誕王宮獻異  
蓮花之步撫監儲苑呈祥白馬之蹤伽耶非立行之場擅  
特是坐忘之地始則舉筌蹄而繹理終乃期得意以忘言  
空色兩捐是非俱遣斷言語之路開不二之門湛湛常存  
如如不動不皦不昧水鶴無分無去無來空鵝詎辨洎恒  
星不見之後金人入夢而還象教西流創經行于震旦龍  
波東注餐妙化於迦維仁祠偏滿於郊虞支提充創于州  
部矣建興寺者晉朝建興元年所立也薤草開基疏源設



砌多招法侶廣置緇徒大辨名僧掘衣戾止天親大德挾  
錫來遊厯晉宋而常存經齊梁而永固屬隋季喪亂因而  
廢焉蕪沒一朝荒涼十紀洞房幽闔空留野獸之蹤廣廡  
長廊竟滿巢禽之響崩榛塞路淒涼

闕一字

道之懷駭壁潰

墉痛切桑門之掖有唐上元二年天皇帝爲孝敬皇帝  
崩制所立也三善空留四皓罷遊聲沈鳳鑰影絕龍樓皇  
帝悽馳道之無恭傷臨渦之輟調普天之下廣闢仁祠其  
地距維揚岡連楚塞歸峯南峙凌倒景而干雲蟻浦西通  
下焦溪而沃日且土風多最人望攸高漢帝祠壇瑤席徹



球璿之韻楚王陳迹淮淝播英傑之名徐偃行仁微猷尚在汲黯臥理嘉譽猶存實荆壤之奧區楚都之勝境者也唐之有天下七十餘載矣高祖神堯皇帝鳳起唐郊龍飛參野翦奔鯨而清寓縣銷伏鼉而靜雲雷出震有臨繼天當宁重規累聖被淳曜於圖書允武允文揚鴻輝於帝籙太宗文武聖皇帝樞電摛祥彤雲薦祉大橫成卦三讓之禮愈恭寶祚開元八百之隆已永高宗天皇大帝握蘭演慶夢月貽祥紹三皇五帝之絕軌光乃聖乃神之洪祚皇上聖孚光宅元德昇聞億兆事繁馭朽之懷轉切萬幾務



重履冰之戒愈深神皇德尊軒聖道叶坤元鍊石而補旻

穹執契而成品彙稽帝籙披皇圖構合宮啟陽館神工而

符神造天製而合天心嶽澤効靈河洛開奧慶雲紛郁間

霞彩以成文甘露泛

闕一字

混珠光而動色郊栖祥鳳苑樂

遊麟東楷西環望帝闔而入貢南蠻北狄思解辦以來王

天域垂平樂和禮貴而比丘僧惠靜俗姓卞氏周濟陰侯

卞英之後也三歸早攝六波先悟戒律思備

闕一字

惜鵝珠

道德兼修取光虹玉自道

闕一字

沒後惠遠生前

闕四字

道綱

解紐其有紹斯高躅者其惟上人法師識悟三生心明四



果乘因趣級登十路以高遷喪律背緣入四流而下墜去

垂拱元年發心敬造彌勒像一鋪奉爲皇家帝主及州縣

官僚師僧父母一切庶類數年之間裝嚴

闕二字

且連眸示

妙便寫真容紺髮開儀還圖實相圓光煥彩亂晨景之照

梁背日流明炯朝虹之燭牖談之不可已已其在茲歟次

有寺主比丘僧智須僧智雲上座惠品都維那法

闕一字

惠

崇惠明淨琛淨泰法融等夙懷敏悟早譽克聰行潔珪璧

業周禪誦靈山之妙法毗邪之善談敬之重之載挹載味

而心不住法捨乃遺情知幾其神抑惟明德邛州鎮將劉



元爰蔚州鎮將王本柱國王文霸柱國王超柱國王仕弼  
上柱國王楷騎都尉王肆騎都尉王智略劉德逸並淮南  
蠹桂江北明珠肆談柄于鷄窻縱武能于虎帳旣開冠蓋  
之理還關通德之門屬踐畏途共取誠于冰谷馳心妙境  
同見樂於閑居各捨冰紈志求無上而已下官少披孔籍  
覃思三墳晚學釋經窺窬十步雖日夜無倦端倪靡躬行  
坐未疲波瀾詎際法師不遺淺識見請慙懃雖假數句以  
成文章終懼一字以爲褒貶敢竭愚瞽輒陳聖諦庶化城  
空而劫石盡貞石無刊滄海變而桑田改元言不昧乃爲



銘曰

理超繫象道先天地譯有開宗因無成器嘉號稱十妙門

匪二湛然不動見應斯至

其一

先佛後佛千名萬名天上天

下王城化城一來一去不死不生賢哉妙覺實曰儲明

其二

出門悟道數歲成因遠超三界深明六塵化馴鱗羽德洽

天人言語一段千載元津

其三

箭驚宵漏舟移夜壑漢夢纔

通周日已落孤阜棲鷺疎林隱鶴質明金剛形圖丹牖

其四

慧日遙臨道風振響發迹伽衛聿來中壤月殿崢嶸日宮

宏敞二諦開教三乘駕網

其五

爰靈告謝黃神嘯吟竟飛

其六



字

爭怒鼃音沙河咽鳴

關二

崩岑一摧道樹詎識檀林

其六

皇家創厯廓土開疆繼蹤媧燧齊聖虞唐法門再闢釋網

重張緇徒濟濟梵響琅琅

其七

去斯塵累歸茲法宇妙辨銀

鉛深明水乳緇衣領袖道場儀羽廣樹福田增崇帝主

其八

邈哉伊人至哉羣彥遽驚折軸俄悲毒箭榮利誰重解脫

斯羨蠡髻韜姿開模紺殿

其九

廣川化雉高岳稱龜縣縣畎

澮硤硤川培天高城迴平路通達接江之許連河之湄

其十

日月晦冥寒暑遷易始聞生死俄成古昔天衣拂兮歲深

塵劫空今年積幸微言之不昧刊芳猷於元石

其十一